

## Leenjii Ramadaanaa itti Fufsiisuuf

### Description

Ramadaanni buufata leenjii ol'aanaa namni tokko jirenya ofii ittiin jijiratuudha. Ramadaanni tokko darbee ramadaanni bira yommuu dhufu namni tokko 'Ramadaana kana keessaa jijirama maalii ykn akkami agarsiise?' jedhe of gaafachu qaba. Fakkeenyaf Ramadaana baranaa dheebu, beela fi dadhabbi qofaan dabarsine moo jirenya keenya keessatti jijirama wayii argamee jiraa? Fkn, salaata sirnaan salaatu, wanta haraamaa dhaabu, qalbiin namaaf rahmata gochu, dallansuu too'achu fi kkf. Ramadaana kana keessa jijirama kana fi kan kana fakkaatan yoo argine, jijirama kanniin itti fufsiisuuf qophiidhaa ree? Jijirama kanniin itti fufsiisuuf tarkaanfilee kanniin fudhachuu dandeensa. Isaanis;

**1. Rabbiin biratti hojiin gaariin fudhatama argachuuf (qeebalamuuf) itti fufuu—** "Rabbiin gabbaruu fi ajaja Isaa bakkaan gahuu jechuun hojii ibaada dirqama sitti ta'e yeroo hundaa sirna isaa eegde iklaasa fi beekumsaan hojjachuudha. Ibaadan yeroo hundaa (guyyaa guyyaan) hin hojjatamne gattii wayituu hin qabdu. Osso ibaada yeroo hundaa hojjatameyyuu wantoota sodaachisaa lamatu jira. Jalqaba irratti, ibaadan nuti hojjannu Rabbiin gammachisuu fi itti dhiyaachuf yoo hin ta'in, iklaasa keenya miidhaa irraa buusna. Kanaafu ibaada keenya eeguuf iklaasa qabaachu keenya sirritti mirkanefachu qabna. Lamaffaan immoo, ibaadan keenya sunnah Ergamaa Rabbii (SAW) waliin deemu isa sirritti mirkanefachu qabna."

Namni yommuu hojii gaarii Ramadaana keessa hojjatu iklaasa fi sunnah Ergamaa Rabbii (SAW) hordofuun kan hojjatu yoo ta'e, akkamitti Ramadaanni erga dhumateen booda hojii gaari san dhiisaa? Namni iklaasa qabu hojii gaarii San hin dhiisu. Kanaafu, iklaasa ofii qorachuun hojii gaggarii Ramadaana keessa hojjataa ture, hojjachu itti haa fufu.

**2. Obsa** —namni tokko wayitti bahuu yoo barbaade, hadhaa jirenyaa obsaan liqimsuu qaba. Obsi bakka saditti qoodama. Isaanis; Rabbiin gabbaruu (ibaadaa Rabbii) irratti obsuu, wantoota Rabbiin dhowwe irraa fagaachun obsuu fi musiibaa (balaa) namatti bu'e obsaan dabarsu. Hojii gaggarii Ramadaana keessa hojjataa turan itti fufsiisuuf obsi garmalee barbaachisaadha. Rabbiin (subhaanahu wa ta'alaa) yeroon kakachuun ilmi nama kasaaraa keessa akka jiran ibsa namoota waa afur raawwatan malee.

**"(1). Wa-l-asr (Yeroon kakadhe).(2). Dhugumatti ilmi namaa hoongoo (kasaaraa) keessa jira. (3). Isaan amananii, hojii gaggarii dalagan, haqa walii dhaamanii fi obsa walii dhaaman malee (warri hafan hoongoo (kasaaraa) guddaa keessa jiru)." Suuratu Al-Asr 103:1-3**

Kanaafu, suura tana irra kaane namni tokko addunyaa fi Aakhiratti kasaaraa irraa baraaramuuf dhugaan Rabbitti amanuu qabu. Erga amanee booda hojii gaggarii Rabbiin itti ajaju hojjachu fi hojii baddaa Inni irra dhowwu dhiisu qaba. Akkasumas, haqa Islamaa erga beeke fi hubate booda hojii irra oolchu fi namoota beeksisuuf tattaafachu qaba. Ammas ulaagan afrappaan kasaaraa irraa nama baraaru hojii gaarii hojjatan irratti obsa qabaachu, haqa namootaf dabarsu irratti obsa qabachu; yommuu haqa babal'isan (raabsan) balaa namoota irra namatti dhufu obsaan dabarsu barbaachisa. Akkasumas, namoonni haqa irratti obsa akka qabaatan isaan gorsuudha. Kanaafu, namni tokko hojii gaggarii Ramadaana keessa

qofa hojjate, Ramadaanni yommuu dhumatu hojii gaggaarii keessumattu hojiwwan dirqama ta'an kan akka salaataa yoo dhiise, kasaaraa (hoongoo) irraa baraaramu danda'aa? Kanaafu, hojii gaggaarii Ramadaana keessa hojjataa turre obsaan itti fufu qabna. Yooakkana hin godhiin jijiramni dhufuu hin danda'u.

### **3. Rabbiin kan gabbaran ji'a Ramadaanaa qofa osoo hin ta'in hanga duuti dhuftu akka ta'e beeku –**

Rabbiinakkana jedha: "**Hanga dhugaan (duuti) sitti dhuftu Gooftaa kee gabbari.**" Suurat al-Hijr 15:99

Namni osoo Ramadaana keessa Rabbiin gabbaruu duuti itti dhufte haalli isaa waa tole! Namni erga Ramadaanni deemen booda Rabbiin gabbaruu dhiise, Aayaa armaan olii faallessaa jiraa jechuudha. Rabbiin gabbaruun (ibaadan) jechuun wanta shari'aan Islaama itti ajajje fi wanta namoota irraa dhowwite guutu of keessatti qabata. Karaa biraatin **ibaada (Rabbiin gabbaruu) jechuun- ajaja Rabbiitti buluu fi wanta Inni dhowwe irraa dhowwamuudha; dirqamoota Rabbiin itti nama ajaje bakkaan gahuu (hojjachuu) fi haraama (wantoota dhowwamaa) dhiisudha.** Kanaafu, Rabbiin hanga duuti dhuftu Gooftaa kee gabbari jedhe erga itti nu ajaje, namni tokko Ramadaana qofa waan gaggaarii hojjate fi waan badaa irraa dhowwame, yommuu Ramadaanni bahu waan gaggaarii hojjatu san yoo dhiise fi hojii badatti yoo deebi'e, 'Namni kuni Rabbiin gabbaraa jira' ni jedhamaa ree? Namni tokko guyyoota murtaa'aniif ykn guyyaa duuti itti dhuftu Rabbiin kan gabbaru osoo hin ta'in jirenyaa isaa guutu Rabbiin gabbaruu qaba. Sababni isaas, Rabbiin jirenya nama kanaa guutuu haa xiqqatu haa guddatu wanta ittiin jiraatu kenneefi jira. Kanaafu, Rabbiin qananii lakkaawame hin dhumne isarratti oole osoo jiru namni tokko akkamitti Rabbiif ajajamu (Isa gabbaruu) didaa?

### **4. Adabbii hojii gaggaarii dhiisu fi hojii badatti deebi'u yaadachuu –**

namni hojii gaarii hojjataa ture tokko yommuu dhiisu keessa isaatti jeequmsi fi gammachuun dhabuun ni dhagahama. Sababni isaas, uumamaan qalbiin nama yommuu hojii gaarii hojjatan ni gammaddi, boqonnaa argatti. Fuggisoo kanaa yommuu hojii gaarii dhiisanii fi hojii badaa hojjatan, ni jeeqamti, boqonnaa dhabdi. Ramadaana keessa yommuu hojii gaggaarii hojjannu fi hojii badaa dhiisnu hangam akka gammannuu fi boqonnaa sammuu argannu mee haa ilaallu. Akkasumas, erga Ramadaanni baheen booda hojii gaarii yommuu dhiisnu fi hojii badatti yommuu deebinu hangam akka jeeqamnu fi dhiphannu mee haa hubannu. Iccitiin jiiyni Ramadaana ji'a rahmataa fi gammachuun itti ta'e keessaa tokko namoonni hojii gaarii baay'isanii waan hojjatanii fi hojii badaa irraa waan dheessaniifi. Kanaafu, bartee kana itti fufsiisun maaliif gammachuun fi tasgabbi keenya itti hin fufsiisnee? Hojii gaarii dhiisu fi hojii badatti deebi'uun maaliif gammachuun fi tasgabbi Ramadaana keessa argachaa turre dhabnaa?

Namni yommuu hojii gaarii dhiisu fi hojii badaa hojjatu addunya kana qofatti osoo hin ta'in Aakhiratti adabbii hamaa adabama. Rabbiin warroota salaata dhiisanii fi fedhii lubbuu hordofanakkana jechuun akeekachiisa:

**"Isaan (waarroota gaggaarii) boodas bakka bu'oota salaata dhiisanii fi fedhii lubbuu isaanii hordofantu hafe. Hallayyaah Jahannam qunnamuuf jiru. Garuu namni tawbatee, amanee, hojii gaarii hojjate, warri sun jannata seenu; homaa hin miidhamanu."** Suura Mariyam (19): 59-60

Kanaafu, hojii gaggaarii dhiisu fi fedhii lubbuu hordofuun hojii badaa hojjachuun adabbii hamatti akka nama geessu beekun, hojii gaggaarii Ramadaana keessa hojjachaa turre itti fufuu fi hojii badaa irraa

---

dheessu qabna. Yooakkana goone wagga waggaan jijjirama guddaa argina.

**Guduunfaa**

Kaayyoo Ramadaanaa keessaa inni guddaan taqwaa (sodaa Rabbii) akka horannuufi. Akkuma Xalaq ibn Habiib jedhe, ”**Taqwaa jechuun ifa Rabbirraa ta’een wanta Rabbiin itti ajaje Jaalala Isaa argachuuf hojjachuu fi ifa Rabbirraa ta’een wanta Rabbiin irraa dhowwe jaalala Isaa argachuuf dhiisudha.”** ‘ifa Rabbirraa ta’een’ yommuu jedhu ‘Qur’ aana fi sunnaa Ergamaa Rabbii(SAW) hordofuun hojii gaarii san hojjachuu ykn hojii badaa san irraa dheeessudha. Kanaafu, ramadaanni ji’ a taqwaa irratti nu leenjisuuuf dhufe malee ji’ a nu miidhuf dhufe miti. Nutis leenji kana hanga Ramadaanni itti aanu dhufutti ykn duuti dhuftutti itti fufsiisu qabna. Namni tokko milkaa’ inna guddaa irra kan gahuu wanta hojjatu gaarii san yoo itti fufeedha.

**Date Created**

July 2, 2017

**Author**

admin